

## 3 bulan, 24 kes ceroboh hutan simpan

Mohd Rafi Mamat  
am@metro.com.my



KAKITANGAN Pejabat Hutan Daerah Lipis memeriksa balak yang dirampas di Hutan Simpan Benchah, Februari lalu. FOTO Mohd Rafi Mamat

Kuantan: Unit Penguatkuasa Jabatan Perhutanan Negeri Pahang (JPNP) mematahkan 24 kes cubaan menceroboh hutan simpan di negeri ini sepanjang tiga bulan tahun ini.

Ketua Penolong Pengarah (Penguatkuasa), JPNP Nor Azirim Ahmad berkata, walaupun negara sedang berhadapan Perintah Kawalan Pergerakan (PKP), kegiatan menceroboh hutan simpan dan cubaan memindahkan hasil hutan tanpa permit tetap terus dilakukan pihak tidak bertanggungjawab.

Katanya, pelbagai cara dan helah digunakan pihak terbabit untuk mengaburi pihak berkuasa.

"Sebanyak 24 kes ceroboh hutan simpan berlaku di daerah Kuantan sebanyak tujuh kes, diikuti Lipis (6), Bentong (4), Jerantut (3), Temerloh (2), Raub (1) dan Rompin (1).

"Dalam tempuh berkenaan juga terdapat empat kes cubaan memindahkan balak serta kayu bergergaji berlaku di Jerantut, Lipis dan Kuantan. Satu kes membabitkan kegiatan melombong emas dalam hutan simpan berlaku di Lipis," katanya, di sini, semalam.

Nor Azirim menambah, pihaknya sentiasa melakukan aktiviti penguatkuasaan selain sekatan jalan raya dengan kerjasama pihak berkuasa lain.

Tambahnya lagi, bagi kes tertentu pemantauan dari udara menggunakan helikopter atau dron turut dilakukan.

"Perbuatan menceroboh hutan dan menebang pokok tanpa kawalan akan merosakan hutan selain menyebabkan rugikan pada kerajaan negeri," katanya.

**Disiarkan pada: April 20, 2021 @ 12:20pm**